

Altocomisario Arnhem insigur di cuanto tempo mas e lo keda na Aruba

Altocomisario di Cuerpo Policial di Aruba, Ramon Arnhem, a indica recientemente cu e no ta sigur cuanto tempo mas e lo keda na Aruba desempeñando e trabou cu el a bin ta haci desde augustus 2022 pa motibo di cambio politico na Aruba.

Asina e Altocomisario a duna di conoce na e medio Aruba. nu durante un entrevista realisa cu e medio. Arnhem a combersa tocante su experiencia y vision riba liderazgo mientras cu na mesun momento el a remarca cu e no ta sigur cuanto tempo mas e lo keda na Aruba den su funcion actual debi na e cambio den e clima politico.

E hefe di Polis a indica cu e ta considera su tempo na Aruba un gran honor y a enfatisa cu su meta no tabata pa siña e publico kico liderazgo ta encera, pero pa inspira otro nan pa pensa riba nan propio liderazgo. El a comparti expe-

riencianan personal y a papia di e retonan y logronan cu el a experencia desde cu el a bin Aruba.

Arnhem a papia tambe riba e diferenciacion cultural entre Hulanda y Aruba. El a remarca cu e comunicacion na Aruba hopi biaha ta mas emocional y directo. El a curasha su publico pa durf di pidi yudansa y muestra emocion den rolnan di liderazgo, hasta den un cultura caminda esaki ta menos comun. “Bon liderazgo ta autentico. Bo mester ta bo mes y respeta otro nan pa ken nan ta,” Arnhem a bisa na e portal.

E hefe di polis a indica tambe cu e tin hopi aprecio pa cultura Arubiano y ta haciendo su best pa siña Papiamento pa por conecta miho cu otro nan. Aunke e ta comete eror, e ta mira esaki como un paso importante pa bira mas cerca di e comunidad.

Esaki ta un aspecto cu a re-



salta entre comunidad mes. Hopi a tuma di nota di e esfuerzo di e hefe di Polis pa siña Papiamento y purba papia den e idioma, locual hopi a aplaudi.

Arnhem a enfatisa cu e ta considera su posicion como hefe temporal di polis un honor y responsabilidad, pero cu su servicio continuo finalmente

no ta den su man. “Na dado momento mi posicion lo termina. Tin un tempo pa bay y entrega mi tarea,” el a bisa.

Apesar di e incertidumbre, Arnhem ta mira atras cu orguyo y gratitud riba su tempo na KPA y e acogida caluroso cu el a experencia di e comunidad di Aruba. Su mensahe ta keda cu liderazgo no ta to-

cante poder, pero tocante conecta y inspira otro nan.

Arnhem a traha pa mas cu dies aña den Korps Politie Nederland. E tabatin un funcion importante di hefe pa e distrito di IJsselmeer na Hulanda. Bou di su funcion e tabata dirigi y lidera un distrito grandi cu mas o menos 800 polis trahando den diferente warda pa mantene e seguridad di un comunidad cu basta habitante.

Na aña 2022 el a dicidi di tuma un reto nobo den su carera pa por guia un Cuerpo hoben y dedica. Hunto cu su famia el a bin biba na Aruba y dia 15 di augustus 2022 el a huramenta como Altocomisario di Cuerpo Policial di Aruba. Desde e fecha aki el a tuma e responsabilidad pa guia y lidera e Cuerpo Policial di Aruba pa asina por yuda eleva e cuerpo, pero tambe trece su vision y mision pa e organizacion.

Falta di informacion tocante proceso di formacion di gobierno creando incertidumbre den comunidad

Formacion di gobierno keto bay ta den su proceso, tumando su tempo, cu segun algun persona ta señala ta tumando mas tempo di loke a anticipa, specialmente teniendo na cuenta cu pa 18 di februari e partidonan e formadornan e mester informa Gobernador su Excelencia Alfonso Boekhoudt por escrito tocante nan conclusionnan.

Algun ciudadano subraya cu e tempo aki ta un poco largo, algun otro a indica cu esaki ta normal considerando cu ta trata di formacion di un gobierno cu ta lo goberna un pais, pues no ta algo di haci cune.

Algun otro ciudadano a trece dilanti cu e falta di informacion, e silencio pa loke ta e negociacionnan, cone proceso ta canando, ta un poco alarmante y por ta un indicacion cu e dos partidonan no ta yegando na otro.

Segun rumor cu ta circula, un impasse cu e partidonan ta enfrentando ta relaciona cu e hecho cu lider di partido FUTURO, Gerlien Croes, kier reduci e cantidad di ministerio na siete ministerio, mientras cu partido AVP kier



mantene e mesun cantidad, esta nueve ministerio.

Mas detaye di e proceso di formacion no ta conoci y comunidad di Aruba tin expectativa halto pa loke ta e formacion di e gobierno nobo aki. E falta di informacion ta crea incertidumbre pa loke ta e futuro di e formacion di gobierno.

Tur gabinete ta pretende di ta e inicio di algo unico, algo nobo nunca bisto. Y tin cierto señal cu por indica cu di berdad algo ta cambiando, of no. Esaki por ta riparabel na e eventual repiticion di erornan di pasado, of un claro rechazo di continua cu esakinan.

E pregunta principal ta, kico ta haci cu e composicion final di e ministerionan? Ta conoci



cu desde hopi aña caba den formacion di gobierno no ta tene cuenta mas cu cierto logica den e composicion di e ministerionan, aunke esey inicialmente, na 1986, tabata e pensamiento formando e ministerionan segun cierto criterio relaciona cu e tareanan specifico cu nan tin, cu ta toca otro riba cierto tereno y por lo tanto tin cierto relevancia poniendo nan hunto.

Sin embargo, sigur den e caso di formacion di gobierno di coalicion, oportunismo politico a vence y a bira algo normal cu den formacion ‘tur opcion ta riba mesa’. E negociacion den e estilo aki en berdad ta contribui na e ‘flexibilidad’ na mesa pa por yega na un gabinete, pero mas cu un biaha ta surgi combinacion di cartera cu ta desafia logica completamente.